

شعر
أحوال مصر

شيخ العرب همام

الطبعة الأولى

الكتاب : أحوال مصر

الشاعر: شيخ العرب همام

تصنيف الكتاب : شعر

تصميم وإخراج: م/ هشام أنور

المقاس: ٢٠×١٤

رقم الإيداع: 26143 - 2014

الترقيم الدولي: 1 - 020 - 776 - 977 - 978

دار يسطرون



طباعة وتوزيع الكتب فى جميع أنحاء العالم

المكتبة والمطبعة : ٣ ش صفوت -محطة المطبعة

شارع الملك فيصل - الجيزة

جمهورية مصر العربية

٠١١٥٧٧٦٠٠٥٢ - ٠١٢٢٩٣٠٠٠٢٩

مدير الإنتاج : أحمد عبد الحليم

رئيس مجلس الإدارة : عماد سالم

بريد إلكترونى : yastoron@gmail.com

موقعنا على الفيس بوك : مؤسسة يسطرون لطباعة وتوزيع الكتب

جميع الحقوق محفوظة للمؤلف

شعر
أحوال مصر

obeikandi.com

obeikandi.com

مصّر قبل ٣٠ يونيو

obeikandi.com

القلب الحجر

طالعين ولادك و القلب حجر

ياللي ف هواك اتحكم العجر

عكروا بدر قمر طالع

من فجر ما يعرف غير المواجه

عليت أصواتهم و قالوا

ده انا مش راجع و لاهاجع

غير لما تنطفي نار المواجه

قلبي عنيد يفك القيد

وانا مكمل و هاتحمل

وأزين المرار بالصبر

بحبي أهزم قصور القهر

وعجبي

القلم الحر

القلم الحر يصرخ

أنا كافر...

بأحكامكم... بحكامكم

بأفكاركم.. بدستوركم

بنهضتكم... بخيبتكم

على وكستكم.. ماانا كافر

ياللي قلمكم ممنوع من التفكير

من التعبير... من التغيير

من التأثير على الورق

قلبه اتخنق ماانا الكافر

من التزوير.. من التكسير

من التكفير.. من التهميش

لحق عباد.. ظلمكوا زاد
أنا حر.. حبري ما يضر
على ورق... يسبِّحُ اللي خلق
لعن القلم دي حكومة
نايمة في العسل نومة
ما عندها غير الذم
تعكر للهوى الدم
تفرش أرضنا ب الغم
تزيد في القلوب السم
بكلام مغلوط
على مرطوط بقى ف الكذب
متنقي ومتعبي لنا مخصوص
وكمان مرصوص فوق الكتاف
يقتل الأمل بلا إنصاف

للي روى دمه بساتينها
وزين بالورد مواويلها
بعود ريحان يغني لها
يشيل عنها هموم الذل
يرسيها ... يعديها
يعليها فوق الكل
يرجعها لحضارتها
بعروبتها لزعامتها
لعظمتها متزينة بالفل
مصر هي الحضارة
رغم أنف الكل
وعجبي

راجع لحضن الأم

باحبك يا مصر من يومي

يا مزينة هدومي

ومزهرة خدودي

ولو طایل أزیل قیدك

أبوس إیدك.. في يوم عيدك

يوم ما تنادي وتقولي

ياشعب ده انا منك

باشیل همك

حقكم راجع بقى من تاني

وحق شهيد مات صابر

بايد غادر ومتآمر

الحق راجع يخف مواجع

يرفرف فوق في العاللي

وتعود الفرحة من تاني

تزيد البهجة كمان وكمان

ونشيل اللي زاد الأحزان

فيك يا مصر...

ومش غلبان ..ومش إنسان..

ومش خايف عليك كمان..

ويرجع الأمان..

للقلب اللي كان حيران

زعلان ..تعبان وكمان ولهان

وخايف عليك يا ام الأوطان

باحبك يا مصر

وعجبي

طعم الهتاف بقى مر

طعم الهتاف بقى مر

للي دوّقنا الأمر

والحلق شق السكون

بصوت يزيل الضر

وخلّق للشوارع تغني

إمتى تعود حر؟

وخلق طالعة مساندة

ومش ساجدة

غير لصاحب الأمر

غناه نغم بلا ألحان

ترقص طيور العاللي

يرفرفوا فوق جبين المكان

رصيف الأمل يعطل الإلهام

الإلزام... الأحكام

يزين خدود بحلو الكلام

صوتة غطى ع الأحزان

رسم الطريق للأمام

الخلق فيها الكتاف ...

الحمل عليها بلا إنصاف

والدمع مالي العين.. وينجاف

ينزل يجرحّ خدود الود

يغرد عبيره قوة الورد

أمله يشوف الأمان

ولو عيشه كان حاف

وعجبي

كُتِرَ المَرَارُ زَادَ

كُتِرَ المَرَارُ زَادَ فِينَا الهِمَّةُ

نَنْزَلُ وَقُلُوبُنَا تَشِيلُ الغَمَّةُ

تُكْتَبُ عَلَي جَسَدِ الطَّبِيعَةِ البَهْجَةُ

وَبَتَغْسَلُ غِبَارَ الأَرْضِ بِدَمِنَا الصَّافِي

تَحْضُرُ صَخُورُهَا تَهْمَسُ لِلهَوَى

يَبْقَى نَارُ فِ قَلْبِ اللِّي زَادَ الكَوَى

وَيَدَاعِبُ بَلِيلُهُ وَرَدَ النُّجُومُ

يَصْفَى سَمَا القُلُوبِ مِ الغَيُومِ

يُحْفَرُ السَّلَامُ عَلَي جِدَارِ الحُبِّ

تَنَادِي الأُزْقَةُ ابْعَدُوا الكَرْبِ

وَهَاتُوا بِشَائِرِ الفَرْحَةِ

مِن طُوفِ جَبِينِ الصَّبَايَا

وهزوا طوفان السحاب
اللي على كفها .. مرسوم العذاب
ويميل نخيل الود من تاني
يحضن رمان الأمانى
يبعتها .. يزين بيها وجداني
وعحبي

ليل الهموم

ليل الهموم بيضاجع الأحلام
مولوده نازل بالأوهام
يهز البشر... يعادي القمر
يزيد الصخر جوه العقول
يقفل نوافذ فاتحها الأمل
بظلام دافي... ما يريد إنصافي
يا ليل الهموم قف
القلب فاق يخليك ترجف
إنت واللي قلبه بينزف
صدأ من جهل كان فيه
عود الأمل لَمَ أعضاؤه
رواها بعرق خِلاله
عطر قلوب المحبين
عازمين.. نازلين

بندی صباح حر
ما مبكیش.. ما یغش
زهوړ أحلام مفتحة
مطوحة... یبتسم ما یضر
غیر العناد... قاتل الوداد
بنار تنقاد... یزید البعاد
من شرب الأهوال المر
بحق من رسی الجبال
مجرى الأمان فی الودیان
لیتطر الوطن ب الریحان
اللی ارتوی بعرق الولدان
ویزین رصیف القلوب بالذهب
ویغور اللی علینا کذب
وحتى علی حلم القلوب نصب
وتعود الفرحة وتمحي العجب

وعجبي

نذف القمر

نذف القمر على اللي صار
والريح بتقبل عزيمة الأبرار
والحلو طعمه بقى أمرّ من الصبار
نذف القمر يصرخ بقى ليك
حس بالوطن.. الهم زاد منيك
انظر للسنين اللي من قبليك
الحلم بقى ماشي على عكازين
من كتر الهم نزلت دموعه سيل
يطفي نور الخد ويعمي العين
الخطوة بتدور على الطريق
ومش شايفاه
وساقية العمر تعبت من المناجاة

وتشرق الشمس بقى في الأحلام
وقت الساعة والصفى قادم
والظلام يفارق الطريق الحالم
يتخضر رصيفه ويغنى
ونوره زاد بالدم ومروي
والجرح يلاقي بعدها الدوا
والفرح يعود بإيد الأمان سوا
وعجبي

نغذ رصيد الصمت

نغذ رصيد الصمت

و الوهم راكب حصان الغروب

انكسر عكازه من شوك الدروب

دا الوهم هيفارق الوطن حافي

بيتلسع بنار قايدها في النفوس

و الوهم صار ماشي مكروب

أمله يتوب بعقل مصلوب

وحاله مقلوب من اللي فيه

الوهم هجرته الخضرة

مليان حسرة ما أخذ عبرة

من اللي كان مليه

الوهم ما يعرف غير العناد

النار تتقاد تلبسه حداد

يقتل الواد بسهم البعاد
يا وهم زهر الشجر جنبي
ليتفارق بقى عني
سهم الحقيقة بقى هالك
وبعدها هنا صابني
يكلمني... يوصلني ..
الطريق الزين
و الفرحة تعود تعمّر
تزهّر... تفتح ... تنور..
جبين المحرومين
تعطر شفايف المعدومين
من الپسمة مع النسمة
تحمي من القلوب الخوف
يا صاحب الوهم

وجه القمر

وجه القمر انكشف وبان
هدم بناني غربان
يعمر... يخضر... وزهر..
النسيم ربوع الوديان
شق دروب العمر
وهزم ظلمة الأحزان
و الخوف بيجري بيتداری
بيتحامی ورا السحاب
الخوف بيتطوع بيلم هدوم
بقي ومرّوح مع السلطان
الخوف بقي مبتلى... حنبلى

قلبه مليان زوغان
النجدة كرمت صنف العجر
وانداس ع الغلبان
صاحب حرس ليل
يزيد ويل بني الإنسان
والهم بقى لبَطْ وحلنجلي
جاب اللومنجي يعاند الزمان
جابه حارب وكمان ضارب
على هارب من اللومان
يخرّب فيها... يهد مبانيها
يلغي من الدفاتر بقى العمران

وعجبي

ويل اللي الهوى عاداه

ويل اللي الهوى عاداه

واتعكر النسيم جواه

الرحلة طويلة... جهز الزواد

وصفي عيونك م العناد

وطفي نارالفرقة ... بقت خانقة

وسقط الشجر ورقة

من دخان غدر خنقه

سالت دموع العين دم

وكسر الغيوم غصن الهم

من اللي على البشر اتلم

فرقة ونار وكلام سم

الابن رافع سلاح الكفر

في وجه أبوه ليه قهر !!

وأخ بيقاتل ضد أخوه

أهل النفاق ببساعدوه

يهدم اللي الأجداد عملوه
ويحرق اخضر في الأرض زرعوه
لكن الأرض أمنا طراحة
برجال...بعزيمة...وأهل الصراحة
دمهم فدا أرضهم
ولا يقدر الغدر يهزهم
والإيمان والصبر مالي قلبهم
بنورالخدود في وجههم
و المولى حامي شهرهم
بكره يعيدوا لأهمم..
أرضها... مجدها
عزها... أمنها
واللي هان يتدفن
ومالوش حق عندها
وتسجله بدمعها
فى مقبرة التاريخ

وعجبي

يا ابني دي مش نكتة

يا ابني دي مش نكتة
ولا شعبها تسلية
دول رجالة ومضحية
بدم ولادها وعرق أجدادها
قهرُوا الوسية
دي مش تكية
يا لومنجية على أونطجية
غرسوا الكره ف أرض الولاد
بظلم وعناد
وعلشان تخافي
مالك خايقة ليه؟
ولادك آهم متجمعين
ومشبكين الإيدين
موردين الخدين
وكمان غارسين..

شجر الأمل فوق الجبين

مالك خائفة ليه؟

طلعوا الولاد يكسروا الهم

يهدموا سورالتعالى بالغم

طلعوا والقلب قال مش راجع

إلا لما يغوراللى زاد المواجه

تختفي .. يتنفي .. يصرخ

يقول مش سامع ولا شايف

الشعب مش خايف

و الصبر ليه ضايف ..

العزة مع الهمة

على قوة بقلب فتوة

ودم عزيز .. خفة و لذيذ

إيمانه يغيظ

اللى فى يوم خانك

مالك خائفة ليه

يامصر؟

يا صاحبي

ياصاحبي ياللي مش داري

غير لما يموت الأمل

تعالى نرسم كسورالعظام

اللي روايحه هَلَّهْ من غدر الغدار

انشرخت عيوناً من الفرحة المحشورة..

في غمازات الخدود المقهورة

على الضيق اللي ف صدر الوطن

يرسم قسايدَه بهديل الحمام

زيّن كردون العساكر بالفرحة

يخضر أوراق الشجر الطارحة

بغنوة تنادي شهيد

دمه روى رصيف عنيد

يهز صخر اللي ماليه الإكتئاب

حلمه يدفن صوت الغراب

اللى ع الخير ناح ونقر

دوب حلم البحرخلاه افتقر

لموج يلاغى المراكب

طار نافوخه من اللي راكب

خلّى الأحبة ع الطريق يفترقوا

لاضمين دموعهم بخيط الهموم

عاملينه سبحة يناجوا القيوم

يحرق اللي زاد ع الوطن الغيوم

وخلّى الحزن ملازم لنا دوم

وعجبي

يا بلد فيكِ حاجة تحير

يا بلد فيكِ حاجة تحير
حاضنه الكل واللي عقله صغير
شوفي المتأمركة ودَعها بيقول إيه
ورمل عرّافتها إيه مداريه
لإمتي الهم هتفضلي فيه
ومهما تداري على ابنك و تخبيه
دمع عيونك نازل للنهر يجريه
من اللي فاكر الكرسي دايم ليه
يقتل ضناك من أجل عينيه
و الكرسي فيه اللعنة
والأ اللعنة في اللي قاعد عليه
إنتِ مش في حسابه
دا رضا العشيرة أسمى أمانيه

أقول إيه يا وطن والا إيه
طرح سرك اللي كان خافيه
طالع بهدم حضارة الجد بانيه
و اللي يرشده يقوم يعاديه
يا وطن قول لكبيرنا يعرف معانيه
الظلام اللي زرعه و الفرقة ماليه
قل له ارجع وحاسب الزمان
قبل الندم ما يفارق المكان
قل له اقلع شجر العراك والتوهان
وخلّي نيلك يجري ع الأرض بأمان
وخف الطنطنة و الزوغان
لاكرسي هيدوم لإنسان
اتوحدوا ع الكلمة و القرآن
لتضيع أرضكم في خبر كان
أنا منكم و لكم كلكم مش الإخوان

وعجبي

ياللي فوق زهرنا

ياللي فوق زهرنا
قول هتعمل إيه
في الصواب المتبعترة
وإيه وراك مخبيه؟
بنصبح يوماتي ع الحيرة
م الهم اللي عايشين فيه
فين الطريق قُل لنا
وسط الشوك هنمشيه
ونشيل معاك غلبنا
يا اللي المرار بإيدك بترميه
فوق زهر الغلابة مننا
وتصفي المر ولينا تسقيه

يا محلى جمال طلعتك
وورا بسمة سنك فيه إيه
بكلام مغلوط ومداريه
هنت الشعب وزدت بلاويه
ومهما تزيد المر
الحلو بكره هنلاقيه

وعجبي

مصر بعد ٣٠ يونيو

obeikandi.com

آدي رجالك يا مصر

آدي رجالك يا مصر

ما يصدهم ترابيس

ومهما علي سور القصر

دا اللي علاه إبليس

قاموا حققوا النصر

وغاروا بقى المتاعيس

كل القلوب خرجت برة

طقت من كتر الهموم المرة

تصرخ تنادي أنا حرة

اللي خرج وكان عليه فرض

إنه يصون عزته والعرض

لا يهزه اللي غدر وخان

أمله يشق أمان الأرض
وقف الشباب انحنى للأسفلت
يناديه إياك تقول اغتلت
ده الحق عمره ما يوم يروح
قهرت الغيم بصوتك أوفعلت
غنوة متزينة بميت موال
تقهر قلب اللي عليكم اتعال
مزروع على جبينه الكراهية
بصبرك يا فتى اتغير الحال
طالعين بصوت يهز البحر الجارف
وقف العويل قال ده أنا مش شايف
غير العصاة اللي موالية
أصل البعيد قلبه كان خايف
يهيج عليه المتسترين في الدين
يدخلوه ف زمرة الخايفين

واللي يعارضهم يكون جزاته
يهددوا القلة المصريين
صرخت القلوب ما يحكموا
اللي خانوا الوطن وفيه اتحكّموا
وفات دم كل شهيد
مثل الأفاعي دايمًا يتلونوا
دا الحق راجع وما فيش تفريط
واللي يآمن لهم يبقى عبيط
اللي بيخافوا يعيشوا فيّ النور
يا رب يتعلقوا مثل الوطاويط
تفردوا الشوك تلاقية ورد
ثورتنا ماشية بأمرالأحد
شموع تنور طريق الأجيال
يا مصر إنتِ عظيمة بجد
يا مصر إنتِ قوية بإيمانك

وشجاعة رجال ضحوا عشانك
وخلعوا عنهم غطاء الكذب
واتحرق فيكِ اللي خان
اللي افتكر هيقضي ع الحلم
ترابك مش خسارة فيه الدم
ماراح اللي يقتل مسيرتنا
يا أرض الأمان والعلم
وآخر نفسٍ ليهم يزرعوا الفل
وسط قلوب الصحبة والخِل
ده عُمر الندل ما يقهرهم
اللي اتبعوا سيرة سيد الكل
سرقنوها مرة ومش هتعود تاني
واللي اتدارى ف سنة انكشف في ثواني
إياك تقول انقلاب.. ده صوت الشعب
وكفاية يا غراب زودت أحزاني

كش.. ما اللي راح راح
يا ابو عقل مريض وسواح
مش لاقى غير الدم
يقتل علشان يكون مرتاح
أصل الدين مش لحية على جلباب
ولا ثرثرة والرمح ورا كداب
مليتوا أرضها
بالفرقة والفتنة
أملكم تشوفوها بقى خراب
ونسيتوا إنها أرض العزة
وبركان غضبها يهزكم هزة
نط اللي ف المركبة وفاتوكم
ومش ناقصة تهديدك يا غزة
يا ما انكويينا من إسرائيل
ومن أجل عيون إخواننا شربنا الويل

قضيتنا شعب اسمه فلسطين

مش قلة تايهة وبدون دليل

من كتر الجهل بقيتوا ف زوال

ومعشش في العقول حبة خيال

دي مصر اللي رواها النيل

ما تهز رمشها خسة الأندال

بكلام ناقص وكله هزل

وستارة قال.. حُماة الدين

فوقوا بقى الضمير مختل

صوت رجالها تقول ساكت

لو صرخ تشوف الغربية ماتت

انطرد اليأس من كل باب

أزمنة الطبطبة ولت وفاتت

الجهل واللي حاويه

هنمحي الجهل واللي حاويه
والعنف واللي يساعد ليه
ماعاد فرق بين البشر
كل واحد في عمله بيه
مساعد الخدمات الاحتياج ليه
يزيد تقدم المركب واللي فيه
هترجع الأرض تنام مرتاحة
والحق يعود لاصحابه بالراحة
من غير جهد مع ناس سفاحة
كلام بيقوله القلب بكل صراحة
هنقلع من وسطنا الشيطان
نعيد الهيبة لجبين الإنسان

والكل لازم يشبع بالأمان
ولا يوم عين صاحبها ينام جعان
ونكسي الشجر اللي عريان
من هم زاد عليه زمان
ويعود الدم في العروق دفيان
بالفرحة للراحة وعدم الهوان
والكل عيشته تبقى عال
وكله بأمر مغير الأحوال
تنزلوا ياسادة م الخنزيرة
والقلب فيكم مليون حيرة
وتغور من عينيكم بقى الغيرة
وترجع البسمة تاني لأهالينا
تشيل الأرض فوق الراس
وتسود الألفة بين الناس
والرحمة بيننا تبقى الأساس
..... يارب وعجبي

اللّٰه على جمال الشعب

اللّٰه على جمال ده الشعب
قلبه في السلام بيعيش
بضمير صاحي ومفتّح
ودايماً يحافظ ع الجيش
ياللي بتحارب ع الكرسي
ماقلنا بح..خلص مافيش
إنت اللي هنت الكل
بعبط في كلام على تطنيش
ما طارالغراب يامعلم
واتحد قلب الشعب والجيش
أفرد اليوم بقى لنا
ما يقدر علينا بالتطفيش

ياما كثير قلنا لك
احنا بالعناد مانجيش
يافرحتها بيك القلة
ياأبو خطابات كلها تشويش
والشعب لما يثور
ناره بتاكل ما تخليش
واللي بيوتهم بالإزاز
تخليُّ بالها من الخفافيش
كترت همومك
يامزود بيبان قلبك بالشيش
لم خيبتك من الشارع
ومعاها حبة الحرافيش
عمر الشرعية ما بالقوة
ولا بالسيطرة والتكبيش

جماعتك ما يوم تحمي
أصل الخاينة ما تحميش
الشعب قلبه صلب
لو مش في صفك ماتعديش
رجالة كلهم أسود
يامصر اتنفضي وماترحميش
الشعب أقسم ليحميك
من قلة والله ماتساويش
يا ام الرجال مناضلة
تلف العالم زيّه مافيش
واللي يشوف اللي خالك
أمانة عليه يسلمه للشاويش

وعجبي

اللّٰه عليكِ يا مصر

اللّٰه عليكِ يا مصر

سقط الطغاه ماحد بكى عليه

غير اللي عقله الجهل ساكن فيه

سقط اللي قتل والدم مالي إيديه

سقط اللي بعباية الدين

يسرق ويداري فيه

حرق الأرض والعرض..

هان عليه

أمانه اللي يقابله

باسم مصر يقبض عليه

ولو بحكم العرف

اللي خان جزاؤه إيه..؟

يتحرم من أرضها
وماء نيلها خساره فيه
الله عليكِ يامصر
يحمي المولى رجالك
صرخوا في وجه العدا
اللي قطع وصالك
ياما طغاه كثير
اتحرقوا في أمانك
الله عليكِ يامصر
شجرك آهو زهر
ملا الميادين ومنور
ومش راجع تاني
إلا لما اللي خان يتقهر
الله عليكِ يامصر

بكاء الغلابة

على الصخر سكن جوه الضلوع
ومن الطمع قفل العين ب الدموع
شقيت الأرض ببكاء الغلابة
لما زاد على أكتافهم الكآبه
والكنز محفور في قلب البلد
حب الوليد قبل مايتولد
والورد زهرٌ فوق الشفايف
يحسه حتى اللي قلبه مش شايف
قالع الحسد من الجذور
والحزن صار ماشي محظور
يدور على جحر من الجحور
يرتمي فيه بقى ويغور

تفارقه النزاهة لما يشوف النور
أصله مايعرف قيمة الأمان
ولسان حاله يغير الزمان
قتل نفسه والله بإيديه
واللي في المركبه فاتوها ليه؟
تغرق ولا حد سأل فيه
وده جزاء اللي شيطانه..
ضاحك دايمًا عليه

وعجبي

تاه القلب

تاة القلب ف حل المسألة
وضاعت الخلق المأصلة
رفضت قلوبنا المهزلة
واللي ماكانت عندنا
عايشين في سلام ما يهمنا
وكافيين بخيرنا شرنا
هلّ غراب يخرب عِشَّنَا
وقال كمان يحرق دمنا
ناسي إننا أصل وجدود
والمجدعة بتجري ف سرايين قلبنا
ماتغور عننا مش واجهة لنا
لنرسمك بريشة فوق الفخار

ونعملك لعبة في إيدين الصغار
يامسخرة ومتعطرة بحبة غبار
ياوكستك في صبغتك لما تدوب
تبان شيبتك مكسوف منها
اعمل لها مليون حساب
إنت مفارق ياللي بتصاحب العذاب
وقدم بقى حبة احترام
يامهزلة وحطت فوق المكان
تلم الخبايث حولها ويفارق الأمان
ياصورة جاية م العدم
بصداقة من إبليس المحترم
تهين الهرم ياللي معروف تمامك
فاقد الخبرة حتى ف كلامك
والمعرفة مخاصمه نظامك
إياك تنسى بقى نفسك
ياشجرة ممنوعة من الضل

بعقل مختل وفرع مهطل
ياشجرة بترمي ثمارها للحريم
مرة للرجال وتمام
بقلب رخام وبفكر سقيم
يامتنشي بقى بصبار
عقل من جواك طار
وعيون ما تعرف غير اعصار
لأسيادك أساس الدار
عيب اختشى وغار
يا أبو فرع غير معروف
بتتعالى على أصل مع ضيوف
ده انا مسافر بلاد وكفور
ما لقيت شبيه ليوم ماغور
اسأل بقى عني الزمان
يشهد معايا كل أركان
مسافر ليها أهنيها

أرتب كل الآهات فيها

أرجع البسمة تعم أراضيهـا

ده انا كبير بفعل خطير

ماليك لازمة ولا تهز..

ف يوم ريحك أغصاني

ده شوك قلبي يعلمك

المعرفة كيفها ف ثواني

تشوف طيفي يهب

لسانك واقف لأمثالي

يامتعالى بقى فشلت

أمانة عليك تسكت

وكفاية دا الهوى منك

كل البيان ليك اتقفلت

وعجبي

روينا الأرض وُصنا العرض

روينا الأرض

وصنا العرض

بدم شهيد

كسرنا حديد

هزمتنا وعيد

وقلب عنيد

ونارهم بتقيد

من شبابنا أكيد

قالها بصراحة

وبكل وضاحة

دي عصابة نطاحة

ماليها ف حكم

قليلة العلم
بفكر ضئيل
وعقل هزيل
ماليها دليل
في طريق الويل
ماشية بشموع
وقلب مسروع
تقسم أدوار
تجمع غدار
يهين الدار
والحجة دي إية
ياسعادة البيه
بتقول شرعية
شرعية إيه والبيض بجنيه

شرعية مين
اصحوا يانايمين
الشرع دا قال
تقتل دا الخال
وتفرق ف الحال
بين أهل نضال
والحق آهو بان
اتلم يا جبان
خليكوا صالحين
وارجع للدين
والحق يابيه
الله يخليك

وعجبي

سيوف العدل

يا سيوف العدل انتِ فين؟

اصحي وفتّحي العين

اقضي بأمره ع الفاسدين

اللي ياما تاجروا بالدين

ياسيوف العدل يا أبيّه

تعب قلبك من المهاتيه

مين اللي قتل ياسين يابهية

وبكذبُه قال لينا بلطجية

ياسيوف العدل ماتكشي

وإياك ف يوم تنسي

إنك في الأرض بأمره

ولا يكسروا اللي غدروا

ياسيوف العدل

عاشقين ترابك

عاشقين ترابك والساقية
يامهد الجنود الأختيار
يغور الكل وانتِ الباقيه
حلمك عرف بقى المسار
كل النجوع بالدم رايقة
والقلب عرف مين ليه غدار
علمتينا أصول الصبر
وازاي نصون الأرض والدار
من أجل عيونك القلوب تتحمل
والحلو نشرُّه صبار
بنعشق دلالك يا أمى
ياأحلى غنوة ع المزمار

على ناي قلبك أدندن
موال يفتح في الكون أزهار
يا أرض الطيبة والحنان
ده قلب ابنك فارس مغوار
يا فرحة جوه عيون الزرع
بترويهها دمعة بعين الصغار
يا ام بحر موجه هادي
وعلى اللي يعاديك إعصار
بقلب ما يعرف الغدر
أرضك بتلفظ منها الغدار
بساتينك تدعي لك في فجر
البسمة تعلق فوق الأزهار
بايدينا نزين أحلامك
ولا يفرقنا بقى الأشرار

بأيدينا نزرع حلمنا
وبرعاية حماة الدار
بتهون الصعاب لينا
بروح شهدائك الثوار
الهم ما عاد يرمينا
إنّ في رعاية الواحد القهار
يا مصر

ما قلنا خلاص

ماقلنا خلاص

الحَكَم رفع بقى الراية

مافي قلبه حاجة ولا غاية

رفع الحَكَم والمباراة انتهت

اتفرقت اتشتت

الفرقة اللي بقيت مهزومة

ومخزولة ومعزولة

بأفعالها بقى المشئومة

ومن قبله رفع الشعب

كارت أحمر للي زاد الغلب

وطير نهضة بقى طار

وفات ريشه

للهوى يبعتره على الثوار
يهنيهم .. يناديهم
يحببهم ... يواسيهم
في شهيد تاني
يقول اصبر بقى يا أخيار
ما الخير راجع من كل مواقع
ومن الأقطار
تقول عربية .. على أوروبية
على مصرية برجال أطهار
ده انا مهاجر ومغادر
أزبل ليكم نهضة من أبحار
واشيل هم أثر من على أكتافي
بكل ضفاف من أنهار
وأعيد ليكم الأمان يجري

في نهر عظيم بلا تحكيم
ولا تعتيم على أخبار
وأهنيكم يا شعب كبير
قلبه ع المر سهار
واقول تاني كلام في ثواني
ولا تخافوا ... هتتعافوا
من الأخطار
ما قلنا خلاص

وعجبي

مبروك عيك يامصر

مبروك عليكِ يامصر
رجوعك لينا من تاني
وغار عنك اللي زاد أحزاني
مبروك عليكِ يامصر
رجعتي تحضني.. تروي
تطبّي ابنك الغالي
ومبروك علينا يا مصر
قلبك الصافي
حضنك الدافي
دمعك الجاري
يزيل آثار اللي عاداني

مبروك علينا ياست الكل
يا أرض الوفاء والضل
يانبع الحنان للكل
مبروك عليك يامصر
حصدتي اللي زرعته
ومن نيل قلبك رويتيه
شباب الأمل ليك مالیه
يخضر صحاريك بعرقه
وبروحه ليك يراعيه
مبروك عليك ثمار أرضك
اللي بيصون عرضك
يا عروسة والدم كان مهرك
زین الفستان بعرق الجبين
يا ام الرجال قلبها فدا
عالية الراس ولا يوم تنحني

لغير الواحد القوي

مبروك عليك يام الشهيد

دمه روى الأرض ليوم جديد

يفتح بساتين الأمان لكل وليد

وزين سما أرضنا بلحن سعيد

مبروك عليك دمه مش بلاش

طهر الأرض من اللي ميسواش

مايعرف غير الظلام مثل الخفاش

وكشف القناع عن كل غشاش

وسيف الحقيقه ماشي بقى قشاش

يللم كل الطغاة واللي خان

وسجل اسمه علي جدار الزمان

ملحمة يتعلم منها الإنسان

أن لا يآمن للي نسي القرآن

مبروك عليك يامصر

مرارة بزمان

ما حدث عند مرارة
تكون بزمان أو جدران
تكون شغالة بألف حصان
وتتحمل كذب بني الإنسان
وتكون تقدر تصبر ع الطغيان
ما حدث عند مرارة
مرارة عفيّه وتقاوم
اللي قال أنا اللهم حازم
أقتل.. أهين القلب الجازم
نخللي قلبه يلطم الخدود
تدورّ ع الدم فيه مش موجود
بقي صاحب الهم الدولي
أبو ريح فيه غل وشواضلي
والشعب أصيل وبراحته هيسامح

بس يا عيني عليه
من اللي مخاصم التسامح
أصلهم عايزين مرارة صلبها متين
ومش هتلاقيها غير في الأمريكيتين
أمانة اللي يلاقيها يجيب ألفين
ويعمل حساب الغلابة بالملايين
ولأهل الصحافة المرارة من جيبي
والإعلام كبيرهم وصغيرهم حبيبي
واللي مالوش فِ النفاق يبقى قريبي
مرارته صلب ومن جيبي
يا منتجين اعملوا مرارات
خمسين مليون فرقعهم البهوات
والباقي قايدة فيها حريقات
واللي مريضة من التصريحات
والباقي شالوها من ربوع القرارات
بكرة الأمل ينور الطرقات
وعجبي

وعزلناه

وعزلناه واللي معاه
خان الثورة بقتل الفرحة
خدنا ف دوكه بأفعال
محبوكة تهز قرود الغابة معاه
علشان كده احنا عزلناه
وحبسناه بجريمة قتل ياولداه
فات الدكه فاكرها دي تركة
يرمح فيها يهين أهاليها
واللي يعارضه بقى يقصاه
علشان كده احنا عزلناه
والشله اللي ماشيه وراه
شوفتوا الشاطر
جاي بمخاطر

يبيع الدولة.. أصلها عزبة
من أملاك الباشا باباه
علشان كدة احنا سجنانه
واللي معاه دي عصابة
منهم لله
وآه لبدعدع جاي يتدلع
في الإسعاف فاكرنا نخاف
من تهديد .. قلوبنا حديد
وإرادتنا بقى محاطاه
علشان كدة احنا عزلناه
واللي معاه بكرة يكونوا جوة معاه
قال جاي بيعادي
تاريخ أجدادي
بفكر معطل وعقل مهطل
يلم عشيرة.. كلها حيرة
تهين الشعب اللي اداه
كرسي عظيم .. قام بغباه

يقتل اللي يقول له لا

علشان كده احنا عزلناه

جابوا بلتاجي يقلّ مزاجي

نار الغلب وشالوا وياه

علشان كده احنا عزلناه

وحبيبي عريان عقله ف زوغان

للست هات أصله ف توهان

بيعادي الأمة منه لله

هاج الشعب وقام ورماه

علشان كده احنا خلعناه

وقاموا بمناورة

يهينوا الثورة

برجال من بره

يهزوا الأمة

جاتهم لمة

ليهم همّ واللي معاه

علشان كدة احنا خلعناه

شوفتوا الواطي
كان بيطاطي
لقتل جنودنا
وعرق أجدادنا بقى ضحاياه
علشان كده احنا خلعناه
جابوا سيدوا حازم
وكان مش لازم
يفضح نفسه .. آهو خد بالجزمة
أصل الماما أمريكا فايتاه
علشان كدة احنا حبسناه
عيني ياسي مرسي
ماضاع الكرسي
والدنيا مش باقية غير لله
علشان كدة احنا خلعناه
وعزلناه وعلى كتب التاريخ رميناه
ومليون بالاص مكسوره وراه

ياللى سرقت اللحم

ياللى سرقت اللحم
بحر كدبك آهو بان
وقاعه شاع منه الظلم
يكسر مراكب الغلبان
بنيت على أجساد الولاد
رويت الأرض بدمهم ياجبان
دي السفينه كبيرة عليك
وعمرك ماكنت ربان
آخرك تكون فيها شيال
مسكت الدفة وقلت أنا قبطان
ضاع من وجوهكم الحياة
بصوت وصداع أنا رهبان
ضيعت تاريخ أسلافك
ف جنسية لولادك أمريكان

عيون الوطن بقوا مقهورين
وانت بتقدم الولاء المبين
هاج الوطن ع الخونة المجرمين
زارع الخدعة في الشرعية والدين
كان أملنا نكون متحضرين
لاقينا النحاس مثبت ف الإيدين
ولعبت بيك شرعية الشياطين
تهدد مصر بجماعة محظورين
ماانت قليل الأصل
مش عارف الشعب ده مين
لا بنتهدد ولا بنخاف
احنا جدودنا المصريين
اللي بنوا الأهرام
خاضوا الحرب بصلاح الدين
رحلت ياعم ف شربة ميه
وفي المزبله بخونة مأجورين
وعجبي

الفهرس

- ٥.....مصر قبل ٣٠ يونيو
- ٧.....القلب الحجر
- ٨.....القلم الحر
- ١١.....راجع لحضن الام
- ١٣.....طعم الهتاف بقى مر
- ١٥.....كتر المرار زاد
- ١٧.....ليل الهموم
- ١٩.....نذف القمر
- ٢١.....نفظ رصيد الصمت
- ٢٣.....وجه القمر
- ٢٥.....ويل اللي الهوى عاداه
- ٢٧.....يا ابني دي مش نكتة
- ٢٩.....يا صاحبي
- ٣١.....يا بلد فيكِ حاجه تحير
- ٣٣.....يا اللي فوق زهرنا

- ٣٥ مصر بعد ٣٠ يونيو.....
- ٣٧ آدي رجالك يا مصر.....
- ٤٣ الجهل واللي حاويه.....
- ٤٥ الله على جمال الشعب.....
- ٤٨ الله عليك يا مصر.....
- ٥٠ بكاء الغلابة.....
- ٥٢ تاة القلب.....
- ٥٦ روينا الأرض وُصِّنا العرض.....
- ٥٩ سيوف العدل.....
- ٦٠ عاشقين ترابك.....
- ٦٣ ما قلنا خلاص.....
- ٦٦ مبروك عيك يا مصر.....
- ٦٩ مرارة بضممان.....
- ٧١ وعزلناه.....
- ٧٥ يا اللي سرقت الحلم.....